

Date – 04/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma kaihhruai Council of Minister vawiina thukhawm chuan India leh Myanmar ramri hung chu duhlo mahse Central Subject a nih avangin state sorkar chuan dodal theihna a nei lo an ti.
- 2. Mizoram Agricultural Marketing Board chuan kumina sawhthing hralhna tura tender rate an bituk kg-a cheng 40 atanga cheng 45 inkar chu chhangtu an la awm lo tih an sawi.
- 3. President Drouapadi Murmu-i chuan vawiin khan Manipur-a President's rule puan mek chu a hlip
- 4. Manipurah hian BJP kaihhruai sawrkar thar a piang dawn.



COUNCIL OF MINISTERS MEETING

Chief Minister Pu Lalduhoma kaihhruaiin vawiin khan Council of Minister te Meeting neih a ni a, India leh Myanmar ramri hung chungchangah Mizoram sorkar chu a dinna ngaiah a la ding a. Amaherawh chu Central Subject a nih avangin state sorkar chuan dodal theihna a nei lo an ti a ni.

An thu pawm dang zingah School Provincialise theih te chu hlankai ni se an ti a, Dan anga tih fel ngai te tihfel a nih hnuah Law Department endik tur a ni a, chumi hnuah Finance Department leh DP & AR paltlang a ngai leh dawn a ni.

Hei bakah hian The Mizoram State Cooperation Policy, 2025 - The Mizoram Home Guards Rules, 2025 - Sialkal Range Development Council Draft Bill, 2026, Mizoram Private Security Agencies (Amendment) Rules, 2026 te, Mizoram Jan Vishwas Bill siamthatna tur te, Mizoram Drug treatment-cum-Rehabilitation Centre Accreditation Draft Rules, 2026 te an pawm a ni.



CENSUS

Sorkar laipui hnuaia Directorate of Census Operations hotute chuan kumin April thla atanga September thla chhungin chhiarpui thawh khatna, ram pumah neih a ni dawn, an ti.

Census Operations hotuten Akashvani News Aizawl an hrilh danin, kumin April thla leh September thla inkar a chhiarpui thawh khatna neih tur hi, a hmingah house listing operation tih vuah a ni a, hemi hnuaiah hian chhungkaw member zat leh chhungkaw lu berte chhinchhiah a ni ang. Census Operations hotute chuan Akashvani corr zawhna chhangin, Mizoram a census thawh khatna tih hun tur ni chu sorkar laipuiin a la hriattir rih loh thu an sawi a, hriattir an nih ve leh Mizoram sorkar hnuaia census kaihnavih State Nodal Agency nen chet lak dan tur an rel tur thu an sawi bawk.

Census Operation hotute sawi danin chhiarpui thawh hnihna “Population Enumeration” chu nakum 2027 February ni 9 atanga ni 28 February chhunga neih zawh hman vek tum a ni bawk.

Kan correspondent report i lo ngaithla ang.

”India ramah hian chhiarpui hi kum 1881 atang khan fumfe takin kum 10 danah neih chhoh tan a ni a, kum 2021 kha dan pangngaiah chuan chhiarpui tum 16-na neih hun tur a bituk kum nimahsela, Covid-19 hri leng avangin neih theih a ni ta lova, 2021 atanga chhiar a kum nga hnu, 2026 atangin chhiarpui tum 16 na nei tur hian nikum 2025 June ni 16-a Ministry of Home Affairs thuchhuak angin inpuahchahna kalpui chhoh tan a ni.

Chhiarpui tum 16-na neih turah hian hun dang ang lo takin mobile application hmangin chhiarpui thawh khatna, house listing operation neih a nih hma ni 15-ah chhung tinten Self enumeration tih tur a ni a, hei hi sorkar laipui atanga thuchhuak a awm ve leh Mizoramah pawh tih tan nghal tur a ni a, a tihdan tur pawh sorkarin a rawn tichhuak mai tura rin a ni.

C. Lalhmunsangi, Akashvani News Aizawl.



GINGER

Mizoram Agricultural Marketing Board (MAMB) hotute chuan kumina sawhthing hralhna tura tender rate an bituk kg-a cheng 40 atanga cheng 45 inkar chu chhangtu an la awm lo tih an sawi.

MAMB hotute’n Akashvani News Aizawl an hriih danin, sawhthing chingtuten a an sawhthing hralh tur an dahkhawmna Secondary Collection Center (SCC) chu kumin atangin awmze nei taka kalpui a nih thu an sawi a. Nikum lama sawhthing chingtute’n an sawhthing chawh hmasak apiang SCC-a an dah khawm chuan sawhthing rihna a tih hniam bakah tawih chhia a siam tam avangin hemi pumpelhnan hian kumin lamah chuan sawhthing dah khawm pawh awmze nei zawk a an kalpui thu an sawi. SCC-a sawhthing dah luh chu a dahna ipah a neitu hming leh khaw hming bakah ration card number emaw aadhaar card number ziah tel thlap thin a nih thu an sawi bawk.

Kan correspondent report i lo ngaithla ang.

“Mizoram Agricultural Marketing Board hotute chuan mi thenkhatin Manipur leh Burma atangin sawhthing chawh sa man tlawm te a la lutin, Mizoram a chin ang a hralh chhawn leh an tum tih an sawi a. Hetiang thil ti thinte hi an hming leh an khua an hriat vek tawh bakah Champhai Bawrhsap leh Home Department lam pawh hriattir an nih tawh thu an sawi bawk”.

Lalengmawii, Akashvani News Aizawl.



LIQOUR SEIZED

Mizoram sorkar chhinchhiah danin, nikum December thla chhung khan zu zuar mi 608 bakah rakzu litre 4,964 chuang man a ni.

Mizoram sorkarin a chhinchhiah danin, nikum December thla khan Excise and Narcotics Department chuan zu zuar mi 593 an man a, Mizoram Police pawhin zu zuar hi mi 15 man bawkin, zurui Excise lamin mi pakhat an man bakah, Police-in mi 6 an man bawk. Nikum 2025 December thla a Excise and Narcotics Department ten zu bilh lai an man zat chu tin 3,336 a tling a, Sapzu-IMFL chu Excise and Narcotics Department hian ml 750 bottle 2,020 an man a, Police lam pawhin bottle 1,848 an man bawk, Excise leh Police-in a um puitling an man zat hi bottle 3,868-a tling a ni.

Excise and Narcotics Department-te hian IMFL hi um chanve chi 1,701 bakah Mizoram Police-te chuan bottle 576 an man a, sapzu um chanve man hi a belkhawmin um 2,277 a ni a, hei bakah hian Mizoram Excise and Narcotics

Department chuan IMFL ml 180 bottle 2,144 bakah Beer ml 650 bottle 21 leh canned beer ml 500 can 8,780 an man bawk.

Excise and Narcotics Department chhinchhiah danin, thei atanga siam, fruit wine chu nikum December thla chhung khan litre 3 chuang man a ni a, BEDC pawh Excise lam hian litre 143 an man bakah, Police lamin litre 372 an man a, Excise leh Police in a BEDC an man belhkhawm hi litre 515 chuang a ni a. Ram dang atanga zu lakluh hi Excise lamin um 21 an man bakah ram dang atang thova canned beer lakluh can 264 man bawkin Excise and Narcotics department hian zu sakna bel 38 an man bawk.

Kan correspondent report i lo ngaithla ang.

Zu kaihnawih avang hian Excise and Narcotics Department chuan lirthei 3 an man bakah Mizoram police lamin lirthei 12 an man a, zu kaihnawih avanga Excise and Narcotics Department leh Police Department-in a lirthei man zat hi nikum December 2025 khan 15 a tling a ni.

John Vanlalchhuanga Akashvani News Aizawl.



CLEAR PROJECT

Pianphunga rualbanlo naupangte tana buatsaih, POCSO Act leh a kaihnawihte sign language leh Mitdel Hawrawp a siam chu vawiin khan Advisor to Chief Minister Pu Lalmuanpuia Punte chuan a hawng.

Project Child Law for Everyone, Accessible and Readable (CLEAR) hnuaia kalpui a ni a, tlangzarh inkhawm hi vawiin khan Aizawla I&PR Conference hall ah neih a ni.

Tlangzarh inkhawmah hian Pu Lalmuanpuia Punte chuan thusawiin, Pianphunga rualbanlo naupang ten anmahni tana hamthatna awm angte leh harsatna an tawh pawha humhimtu dan awm angte an hriat ve ngei chu an chanvo a ni tih sawiin, chumi atana Mitdel ten anmahni hawrawp ngei leh ri hriatna lama harsatna nei ten sign language ngeia chutiang dan an nei thei chu ram pum huap pawhin a chhuanawm hle a ti.

Thalaite pawh Special Education chu ngaiven zual tura fuihin, huang pawimawh tak leh midangte tana rawngbawlina zau tak a ni tih hre reng turin a chah a. POCSO Act leh a chhunga pawimawh zualte sign language leh braille-a siam chu Mizoramin bung thar pawimawh tak a kaina leh rualbanlote ngaihsak kawnga mipuite hmasawna thlentu a nih ngei a beisei tih a sawi bawk a ni.

He inkhawmah hian Mizoram State Commision for Protection of Child Rights (MSCPR) hotute leh Social Welfare, Women & Child Development hotute, Mizorama pianphunga rualbanlote tana zirna school hrang hrang hotute leh zirlaite bakah pawl pawimawh tak tak leh mi pawimawh sawm bikte an tel a ni.



BHARAT RANG FESTIVAL

Theatre hmanga hnam ziarang leh lemchan phochhuahna – ‘25th Bharat Rang Mahotsav 2026’ chu Aizawl Vanapa Hall-ah buatsaih a ni a,

New Delhi National School of Drama leh Art & Culture Department tangkawpin an buatsaih a ni.

Art & Culture Department Director Pi Carol V.L.M.S. Dawngkimi chuan he hun hi hmanpuiin Institute of Music & Fine Arts (IMFA) hnuaiah Drama, Hnam lam, leh Music zirnate tih chantlun zel chu Mizoram Art & Culture Department chuan a tum thu a sawi a, mi tam takin an hman tangkai tawh thu a sawi a ni. Heng zirnate hi mi tam zawkin an lo hriat a an lo tangkai pui zel thu a beisei thu leh School zirlaite pawh an tuina a nih phawt chuan IMFA hnuaiah hian rawn zir ve ngei turin a sawm a ni.

Pi Carol V.L.M.S. Dawngkimi chuan National School of Drama nena thawhona tha zawk an neih zel theih a beisei thu a sawi bawk a ni.

He hunah hian National School of Drama Dean Pu Shantanu Bose chuan thusawiin, Mizoram chuan hnam zia rang ropui tak a neih thu leh hmun zau zawka phochhuah tham hnam rohlu tha tak tak a neih thu a sawi a. He Theatre Festival kaltlang hian hnam hausakna tam tak chu vawngnun leh phochhuah zel a nih ngei a beisei thu a sawi a. National School of Drama, New Delhi chuan Mizoram chu hemi kawnga thawhpui zel a duh thu a sawi bawk a ni.

‘25th Bharat Rang Mahotsav 2026’ hi Delhi ah January ni 28, 6 khan neih tan a lo ni tawh a. India ram hmun hrang hrangah hman tura kalpui chhoh zel niin Union Territory leh State zawng zawng ahte hman a ni dawn a. Ram pawnah pawh neih tura ruahman a niin Continent panga (5) ah hman tura ruahman a ni bawk. Bharat Rang Mahotsav hi khawvela Theatre Festival lian ber niin National School of Drama chuan hemi kaltlang hian Theatre Culture chawisan hi a tum a ni.

Vawiin hian National School of Drama chuan MacBeth William Shakespeare-a ziah ‘Flesh’ chu an entir a. Mizoram atangin Chawngmawii leh Hrangchhuana, Pu MS Ralte, Drama Instructor, IMFA Script ziah chu entir a ni bawk a ni.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



PRESIDENTS RULE REVOKED IN MANIPUR

President Drouapadi Murmu-i chuan vawiin khan Manipur-a President's rule puan mek chu a hlip a. Nikum Februaryni 13 khan Manipur ah hian Presidents Rule hi puan a ni a. Union Home Ministry chuan hemi chungchang hi thuchhuah siamin President Murmu-i chuan ram danpui article 356 tlawhchhana Manipura Presidents Rule puan mek chu hlih a nih thu a tarlang a ni.



MANIPUR

Manipurah hian BJP kaihhruai sawrkar thar a piang dawn. Nimin khan NDA Legislature Party inhmukhawm chuan Minister hlui Y Khemchand Singh chu an leader atana thlangin Manipur Chief Minister thar tura thlan a ni a. Kuki hruiatu leh minister hlui Pi Nemcha Kipgen chu Deputry Chief Minister atana thlan a ni bawk.New Delhi-a BJP headquarters ah nimin khan BJP Legislature Party te hi an thukhawm a. He thutkhawmah hian BJP MLA 37 zingah 35 an tel thei a. BJP Central Observer Tarun Chugh,BJP North-East Incharge Sambit Patra leh BJP State President A Sharda Devi te pawh an tel a ni.

Y Khemchand Singh hian vawiin khan state sawrkar a siam theih thu hi Governor Ajay Kumar Bhalla hnenah a thlen a. Vawiin tlai dar 6 khan Sawrkar thara Chief Minister leh Deputy Chief Minister te hi rinawmna thu tiam tira lakluh an ni.



RATION CARD

Sawrkar laipui chuan ramchhugna ration card zaa za khawl hmanga chhinchhiah vek anih tawh thu a sawi. Vawiina Lok Sabha-a zawhna chhangin Union Minister of State for Consumer Affairs, Food and Public Distribution Nimuben Bambhaniya chuan ration zaa 99 chu Adhaar nen thlunzawm a ni tawh bawk a ti a. Mitinin an mamawh khawp chaw ei tur an hmuh chu Prime Minister Narendra Modia ngaihpaawimawh hmasak anih thu a sawi a ni.

